

दिनांक 19.09.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- राज्य मंत्रिमंडल की मीटिंग मांय आज महाराणा प्रताप स्पोर्ट्स यूनिवर्सिटी जयपुर बिल 2025 रा मजमून ने मंजूरी देवण समेत केई खास फैसला करी ज्या।
- मुख्यमंत्री भजनलाल शर्मा जयपुर की राजस्थान पुलिस अकादमी मांय सिखावण रो नुवो भवन बणावण रो ऐलाण कीनो- कह्यो- प्रदेश मांय अपराधां माथे काबू करण सारू सरकार रो खास ध्यान।
- प्रधानमंत्री नरेन्द्र मोदी रो 25 सितम्बर ने बांसवाड़ा ऊं विकास की 1 लाख 21 हजार करोड़ रुपया ऊं बत्ता खर्च वाळी केई परियोजनावां की सौगात देवण रो कार्यक्रम।
- केन्द्रीय कृषि मंत्री शिवराज सिंह चौहान कह्यो- जीएसटी सुधारां ऊं किसानां ने सीधो फायदो मिलेला।

000

महाराणा प्रताप स्पोर्ट्स यूनिवर्सिटी जयपुर बिल-2025 रा मजमून ने आज आज राज्य मंत्रिमंडल की मीटिंग मांय मंजूरी दीरीजी। प्रदेश मांय विश्व स्तर की खेल प्रतिभावां तैयार करण रा मकसद ऊं ओ बिल विधानसभा रा आवता सत्र मांय पेश कर्यो जावेला। मुख्यमंत्री भजनलाल शर्मा की सदरत मांय वही मीटिंग मांय आज केई खास फैसला करी ज्या। आं मांय **राजमेस** मेडिकल कॉलेजां मांय एनआरआई कोटा रा तैत दाखिला सारू फीस कम करण, गुजर चुक्या कर्मचारियां रा मायतां अर दिव्यांग संतान सारू पारिवारिक पेंशन रा प्रावधानां ने आसान बणावण अर न्यारा-न्यारा महकमा मांय काम कर रह्या कर्मचारियां ने पदोन्नति रो फायदो देवण सारू सेवा नियमां मांय बदलाव समेत केई फैसला शामिल है। मीटिंग पाछे खबरनवीसां ने आं फैसलां की जाणकारी देता थकां उपमुख्यमंत्री प्रेमचंद बैरवा बतायो के खेल विश्वविद्यालय, खेल विज्ञान, स्पोर्ट्स टेक्नोलॉजी अर परफॉर्मन्स एनालिटिक्स माथे शोध ने बधावो देवेला, जिण ऊं खिलाड़ियां रा खेल मांय सुधार आवेला।

उपमुख्यमंत्री बतायो के **राजमेस** कॉलेजां मांय एनआरआई सीटां माथे दाखिला सारू फीस ने मैनेजमेंट कोटा की फीस रो अढाई गुना करीजी है। इण ऊं साल 2025-26 रा प्रवेश सत्र मांय एनआरआई कोटा की सीटां की फीस कम व्हे र करीब 23 लाख 93 हजार रुपया सालाना रह जावेला, जो गैर-सरकारी मेडिकल कॉलेजां की औसत फीसदे रे करीब है। संसदीय कार्यमंत्री जोगाराम पटेल खबरनवीसां ने बतायो के मंत्रिमण्डल 5 हजार 200 मेगावॉट बूता की सूरज की रोशनी ऊं बिजली बणावण की परियोजनावां सारू कुछ शर्तां सागे जमीं आवंटित करण की मंजूरी ई दीरीजी है। वे बतायो के राजस्थान सिविल सेवा पेंशन नियम मांय ई बदलाव करी ज्या है। इण रे मुजब गुजर चुक्या कर्मचारियां रा मायतां ने अब 50 फीसदी ताई पारिवारिक पेंशन अर दिव्यांग संतान ने ब्याह पाछे ई पेंशन रो फायदो दियो जावेला।

000

राजस्थान पुलिस अकादमी जयपुर मांय आज राज्य पुलिस सेवा-आर.पी.एस. रा 55वां बैच रो दीक्षांत समारोह राख्यी ज्यो। मुख्यमंत्री भजनलाल शर्मा दीक्षांत परेड की सलामी लीनी। ई मौके वे कह्यो

के प्रदेश मांय अपराधां माथे काबू करण अर शांति व्यवस्था बणायी राखण माथे सरकार रो खास ध्यान है।

वे आरपीए मांय सिखावण देवण रो नुवो भवन बणावण रो ऐलाण ई कीनो, जिण मांय साइबर अर आर्थिक अपराधां माथे काबू करण सारू बेहतर सिखावण अर तकनीकी साधन मुहैया कराया जावेला। मुख्यमंत्री कह्यो के महिलावां ने मज़बूत बणावण माथे सरकार रो खास ध्यान है।

000

प्रधानमंत्री नरेंद्र मोदी री जिन्दगी माथे बणी फिल्म 'चलो जीते हैं' राज्य रा न्यारा-न्यारा सिनेमाघरां अर स्कूलां मांय बतायी जा रही है। फिल्म देख्यां पाछे लोग इण री सराहवणा कर रह्या है। श्रीगंगानगर जिला मांय नौजवानां समेत सगळा तबका रा लोगां मांय फिल्म देखण सारू उमाव निज़र आ रह्यो है। वे आकाशवाणी सागे बातचीत मांय उमाव यों जतायो—

राजसमंद मांय ई जनता अर भारतीय जनता पार्टी रा ओहदादार अर कार्यकर्ता सिनेमा देख्यां पाछे इण ने सीख देवण वाळी बतायी।

000

कोटा मांय आज सेंट्रल को-ऑपरेटिव बैंक लिमिटेड री ओर ऊं गौपाल क्रेडिट कार्ड महान्त्रण वितरण कार्यक्रम राख्यी ज्यो। लोकसभा अध्यक्ष ओम बिरला स्वयं सहायता समूह ऊं जुड़ी महिलावां अर लाभार्थियां ने गौपाल क्रेडिट कार्ड रे मार्फत कर्ज दीना। ई रे अलावा जिला री केई शाखावां रा लाभार्थियां ने ई एक करोड़ रुपया ऊं बत्ती रकम रा चैक दिया ज्यो। ई मौके श्री बिरला कह्यो के अंतर्राष्ट्रीय सहकारिता दिवस रा सिलसिला मांय कोटा-बूंदी संसदीय हलका री केई महिलावां ने योजना रा तैत बिना ब्याज रा कर्ज मुहैया कराया जा रह्या है। वे कह्यो के ई योजना ऊं महिलावां पशुपालन मांय सीधी भागीदारी कर र माली तौर ऊं खुद रे पाण ऊबी व्हे सकेला। कार्यक्रम मांय जिला रा प्रभारी अर सहकारिता मंत्री गौतम कुमार दक अर जनता रा केई नुमाइंदा मौजूद रह्या।

000

स्वस्थ नारी, सशक्त परिवार अभियान रा तैत न्यारी-न्यारी ठोडां शिविर लगा र लोगां री स्वास्थ्य जांच करी जा रही है। बांसवाड़ा री खांदू कॉलोनी री पी.एच.सी. मांय लगायी ज्यो शिविर मांय 273 जणां री स्वास्थ्य जांच करीजी अर वां ने ज़रूरी राय दीरीजी। बाड़मेर मांय लगायी ज्यो शिविर मांय ई महिलावां री स्वास्थ्य जांच करीजी।

000

प्रधानमंत्री नरेंद्र मोदी रो 25 सितंबर ने पंडित दीनदयाल उपाध्याय री जयंती रे मौके बांसवाड़ा ऊं 1 लाख 21 हजार करोड़ रुपया ऊं बत्ता खर्च वाळी विकास री न्यारी-न्यारी परियोजनावां रो उद्घाटन अर शिलान्यास करण रो कार्यक्रम है। आं परियोजनावां ऊं राजस्थान, मध्यप्रदेश, आंध्र प्रदेश, महाराष्ट्र अर कर्नाटक समेत केई राज्यां ने फायदो व्हेला। प्रधानमंत्री ई दौरान माही-बांसवाड़ा परमाणु ऊर्जा संयंत्र रा काम री नींव रखेला। वे बांसवाड़ा ऊं ई वर्चुअल तरीका ऊं बीकानेर-नई दिल्ली बीचे नुवी वंदे भारत एक्सप्रेस रेलगाड़ी ने हरी झंडी बतावेला। प्रधानमंत्री रा दौरा ने ध्यान राखता थकां राज्य सरकार सगळी ज़रूरी तैयारियां कर रही है। मुख्यमंत्री भजनलाल शर्मा आला दर्जा रा अहलकारां री मीटिंग ले र अहलकारां ने तालमेल सागे सगळी व्यवस्थावां तैय करण रा हुकम दीना।

000

केंद्रीय कृषि अर किसान कल्याण मंत्री शिवराज सिंह चौहान कह्यो है के खेती-बाड़ी ऊं जुड़्या साज-ओ-सामान माथे जीएसटी री रेट 18 अर 12 फीसदी ऊं घटा र पांच फीसदी कर दीरीजी है। वे आज नई दिल्ली मांय कृषि यंत्र निर्माता संघां रा नुमाइंदा सागे मीटिंग मांय बोल रह्या हा। मीटिंग पाछे केंद्रीय मंत्री कह्यो के इण ऊं ट्रैक्टर, हार्वेस्टर, थ्रेसर अर दूजी मशीनां रो मोल कम

व्हेला, जिण ऊं काश्तकारां ने सीधो फायदो मिलेला। श्री चौहान सगळा कृषि यंत्र निर्माता संघां ने जीएसटी रेट मांय कमी रो फायदो पूरी साफगोई सागे किसानां ताई पूगावण बाबत् कह्यो।

000

भारतीय प्रशासनिक सेवा रा रिटायर्ड अहलकार राजेश्वर सिंह आज राज्य निर्वाचन आयुक्त रो कामकाज संभाळ लीनो। ई मौके श्री सिंह कह्यो के राज्य मांय पंचायती राज संस्थावां अर नगरीय निकायां रा चुनाव वैधानिक प्रावधानां रे मुजब साफगोई सागे कराया जावेला।

000

प्रदेश मांय चौमासा री बिरखा कम पड़बा बीचे राजधानी जयपुर रा केई हलकां मांय आज दोपहरां पाछे मेह व्हेवण ऊं मौसम सुहावणो व्हे गयो। राज्य रा ऊगणी हलका रा केई जिलां मांय ई बरसात दर्ज करीजी। मौसम केन्द्र जयपुर रा निदेशक राधेश्याम शर्मा बतायो के पश्चिमी विक्षोभ रा असर ऊं भरतपुर, कोटा, उदयपुर अर जयपुर संभाग मांय हल्की ऊं मझला दर्जा री बिरखा रा आसार है, जद के अलवर, धौलपुर, करौली, बारां अर उदयपुर समेत केई जिलां सारू बरसात रो येलो अलर्ट जारी करी ज्यो है। 22 सितम्बर ताई प्रदेश रा ऊगणी हलका मांय बरसात चालती रह सके है, जद के आतूणी हलका मांय मौसम सूखो रेहवण रा आसार है।

000

राष्ट्रीय आयुर्वेद संस्थान री ओर ऊं आज जयपुर मांय दिल री बीमारियां री रोकथाम अर बेसिक लाइफ सपोर्ट रा बारा मांय खास जागरूकता अर सिखावण रो सत्र राख्यी ज्यो। राष्ट्रीय सेवा योजना रा विद्यार्थियां सारू राख्यी ज्या ई कार्यक्रम मांय जाणकार दिल री बीमारियां री बधती तादाद अर वां री रोकथाम सारू स्वस्थ जीवनशैली अपनावण माथे ज़ोर दीनो। ई दौरान हार्ट अटैक सरीखा मुश्किल हालात मांय सीपीआर देवण री सिखावण दीरीजी।

000